

Landsvirkjun
Háaleitisbraut 68
103 Reykjavík

Reykjavík 26. apríl 2019
UST201903-053/09.07.01
09.07.01

Efni: Umsókn um leyfi til framkvæmda- Háslón í Kringilsárrana

Umhverfisstofnun hefur mótttekið umsókn Landsvirkjunar, dagsett 1. mars, um leyfi til framkvæmda innan friðlandsins Kringilsárrana.

Kringilsárrani er friðlýstur sem friðland sbr. auglýsingu nr. 181/2003. Allt jarðrask er þar bannað, svo og að skerða gróður eða trufla dýralíf. Samkvæmt stjórnunar- og verndaráætlun friðlandsins hefur Umhverfisstofnun heimild til að leyfa akstur vélknúinna farartækja og framkvæmdir vegna bakkavarna.

Lýsing verkefnis:

Vegna rofs á bakka Háslóns í Kringilsárrana er ráðgert að fara í tilraunaverkefni með allt að 180 metra langri bakkavörn við norðurenda Kringilsárrana. Staðsetning fyrirhugaðar bakkavarnar er sýnd á teikningum sem fylgdu umsókn Landsvirkjunar. Efri brún bakkavarnarinnar mun nema við efri brún bakkans og hafa fláa 1:2. Ekki er gert ráð fyrir að flá niður bakkann heldur verður fyllt að honum með fyllingarefni úr lónstæðinu. Í bakkavörnina þarf um 200 m³ af fyllingarefni, 200 m³ af síuefni og 400 m³ af grjóti. Allt efnið verður tekið úr lónstæðinu en þar er mikið af grófu efni. Bakkinn er um 1,5 m hár á fyrstu 120 m varnarinnar en síðan tekur við lægri bakki, tæplega meters hár á 60 m löngum kafla. Byrjað verður á hærri bakkanum og síðan metið hvort að lægri bakkinn verði einnig varinn. Bakkavarnirnar verða framkvæmdar með 30 tonna gröfu, traktor (220 hestöfl) og sturtuvagni sem færu yfir Kringilsá á vaði skammt ofan við Kringilsárfoss. Bakkavarnirnar verða unnar frá lónstæðinu og áætlaður framkvæmdartími er 10 daga tímabil í byrjun júlí 2019.

Umsagnir:

Umhverfisstofnun óskaði umsagnar Vatnajökulsþjóðgarðar þann 22. mars 2019 vegna framkvæmdarinnar. Umsögnin barst þann 2. apríl 2019. Í umsögn Vatnajökulsþjóðgarðs kemur fram að þjóðgarðurinn gerir engar athugasemdir við framkvæmdina.

Áhrifamat:

Umhverfisstofnun metur umrætt verkefni ekki líklegt til að hafa neikvæð áhrif á verndargildi svæðisins. Stofnunin metur framkvæmdina til þess fallna að draga úr neikvæðum áhrifum á friðlýsta svæðið. Áhrif á lífríki eru metin minniháttar en framkvæmdin fer fram þegar burði hreindýra og varpi fugla er að mestu lokið.

Skilyrði:

Umhverfisstofnun veitir fyrir sitt leyti leyfi fyrir gerð bakkavarnar í Kringilsárrana á bökkum Háslóns, sbr. lýsingu hér að ofan, í júlí 2019 að uppfylltum eftirfarandi skilyrðum:

- Hafa skal þetta bréf með í för á meðan verkefninu stendur og kynna fyrir starfsfólki þau skilyrði sem fylgja leyfinu, áður en undirbúningur og vinna hefst.
- Tilkynna skal til starfsmanns Umhverfisstofnunar á svæðinu hvenær undirbúningur fyrir verkefnið hefst og þegar því lýkur með að minnsta kosti sólarhrings fyrirvara.
- Umhverfisstofnun skal tilkynnt um öll frávik við áður útgefna verkefnalýsingu og eins ef breyting verður á tímasetningu verkefnis eins fljótt og auðið er.
- Virða skal umgengnisreglur sem gilda um svæðið.
- Einungis skal aka þeim tækjum sem notuð verða við framkvæmdina að og innan skilgreinds framkvæmdarsvæðis innan lónstæðisins.
- Þess skal gætt við akstur utan vega að að hann fari fram á tímum þar sem hann veldur sem minnstu raski á jarðvegi og gróðri.
- Gæta skal að mengunarvörnum farartækja og þess gætt að mengandi vökvi berist ekki í jarðveg/vatn.
- Forðast skal óþarfa rask og stærð framkvæmdasvæðis skal haldið í lágmarki.
- Vandað verði við frágang eftir að verki lýkur.
- Umsækjanda ber að tryggja viðhald mannvirkisins.
- Óheimilt er að trufla dýralíf.
- Ef upp koma álitamál um framkvæmdir sem tengjast verkefninu og frágang svæðisins skal hafa samband við Umhverfisstofnun í síma 591-2000.

Ef framkvæmdaraðili veldur náttúruspjöllum með framkvæmd í skilningi 87. gr. laga nr. 60/2013 um náttúruvernd getur Umhverfisstofnun t.d. lagt fyrir framkvæmdaraðila að afmá jarðrask og lagfæra gróðurskemmdir eða stöðvað framkvæmdir sbr. nánar XV. kafla laganna.


Ef umhverfisaðstæður á svæðinu breytast getur Umhverfisstofnun skv. 2. mgr. 89. gr. laga nr. 60/2013 um náttúruvernd breytt skilyrðum leyfis, bætt inn nýjum skilyrðum eða afturkallað leyfið til að koma í veg fyrir verulegt, ófyrirséð tjón á náttúru Íslands.

Leyfi landeigenda og/eða sveitarfélags gæti þurft fyrir verkefninu.

Leyfi forsætisráðuneytisins gæti þurft fyrir framkvæmdunum skv. lögum nr. 58/1998.

Sé skilyrðum leyfis ekki fullnægt getur Umhverfisstofnun afturkallað leyfið skv. 1. mgr. 89. gr. laga nr. 60/2013 um náttúruvernd.

Virðingarfyllst,



Sigrún Ágústsdóttir
sviðsstjóri



Davíð Örvar Hansson
teymisstjóri